

御製八旗通志序

粵稽古唐虞封山濬川命官敷
教諸大政具載典謨而禹貢周
官尤詳於方域官制聖人列之
於經所以著一代之憲章垂奕
世以法守經邦立政惇典善俗
必於茲取則焉我國家受

天景命

太祖高皇帝龍興東土創造鴻基肇
建八旗以統滿洲蒙古漢軍之
衆規模宏遠立極萬世

太宗文皇帝繼緒膺圖遐邇率服輸
誠歸附者雲集景從咸隸旗籍
以固根本

世祖章皇帝統一寰宇定鼎京師詳
定規制體統嚴明建置周密重
以

皇祖

皇考德澤涵濡休養訓迪明禮制興
學校廣儲蓄典章日益明備蓋
自開創以來百有餘年

列聖相承經畫盡善而且响之以天

地之恩篤之以家人父子之親
隆之以肺腑腹心之寄英藩碩
輔宿將名臣佐命宣猷銘鼎鐘
而耀竹帛者後先相望下逮卒
徒韋布亦共識尊君親上之大
義節孝忠烈有不待勉強而出

於至性者雖邠岐豐鎬之遺風
豐沛南陽之故舊曷以加茲顧
其事散見於

實錄會典諸書未有專紀雍正五年
皇考命儒臣纂輯八旗志書昭示永
久乃采撫彙集撰爲八志曰旗
分曰土田曰營建曰兵制曰職

官曰學校曰典禮曰藝文次以
八表曰封爵曰世職曰八旗大
臣曰宗人府曰內閣大臣曰部
院大臣曰直省大臣曰選舉次
以列傳曰宗室王公曰名臣曰
勲臣曰忠烈曰循吏曰儒林曰
孝義曰列女越乾隆四年書成

凡二百五十三卷於是而

列祖創垂之緒損益之宜與夫人物

殊尤之蹟臚舉條分燦然具備

與國史相爲表裏然是書之作

非徒以廣紀載備圖籍已也監

成憲則思所以遵守而修明之

覽風俗則思所以董勸而振作

之篤宗盟則思推一本以睦之
念勲舊則思培後裔以酬之生
聚蕃衍何以阜之人才蔚起何
以牖之本計是圖審所先務斯
則

皇考命纂是書之大指繼序者當敬
承而罔斁也八旗人士尚念國

恩之優厚先業之彪炳流風善
俗之忠直而敦龐服官者竭股
肱從戎者效臂指淳質之風引
而勿替克篤前人成烈以長養
其子孫國家無疆之休其永有
賴夫

乾隆四年四月二十七日

奉

敕纂修八旗通志

諭旨

朕惟漢史始志地理蓋本禹貢職方之遺而條其郡
邑紀其戶口以宣究其風俗教化也今各省皆有志
書惟八旗未經紀載我朝立制滿洲蒙古漢軍俱隸
八旗每旗自都統副都統叅領佐領下逮領催閑散
之人體統則尊卑相承形勢則臂指相使其規模宏
遠條理精密超越前古豈可無以紀述其盛其間偉
人輩出樹宏勲而建茂績與夫忠臣孝子義夫節婦

潛德幽光足爲人倫之表範者若不爲之採摭薈萃
何以昭示無窮朕意欲論述編次彙成八旗志書年
來恭修

聖祖仁皇帝實錄今已漸次告成卽著諸總裁官領其
事選滿漢翰林分纂其滿洲漢軍中有通曉漢文而
學問優長堪備纂修之任者無論進士舉人貢監生
員以至閑散人等俱著該旗都統副都統保送但勿
徇情濫舉不實以副朕慎重著述之至意特諭

雍正五年十一月初八日

八旗通志凡例

一志書專志八旗。旗分首宜清晰。今敬稽

四朝實錄。及大清會典所載。自

祖宗以來。設立八旗。編定佐領。分列方位。并增添更定
一 規制。作旗分志。以冠全書。

畿輔五百里內。八旗有分給地畝。今遵照會典所
載。併查明戶部新舊冊籍。頃畝確數。及

盛京等處旗莊。直省駐防地畝。逐一登載。爲土田

志。以紀

本朝授地之法。其井田及山場草廠。並附載焉。

一志書例載營建。如王府第宅。各按旗分。門殿規模。載在會典。八旗官員兵丁。給與房屋。俱有規制。直省駐防官員。建有衙署。兵丁蓋給營房。近奉

世宗皇帝恩旨。在

京八旗都統。亦俱給與官衙。今查明建置緣由。爲營建志。其左右兩翼京倉。八旗學舍。八旗教場。礮廠等。俱查明創建緣由。附入。

一八旗兵制之善。與古井田寓兵於農。法異意

同。兵丁閑散。一例編審。但餘丁生齒繁盛。月異而歲不同。難核定數。今止詳紀兵制。無庸別志戶口。

一八旗官制。遠邁前古。凡二十四都統所屬。及內大臣。前鋒護軍步軍各統領。內務府總管。各王府所屬官。直省鎮守駐防等官。俱考其品級俸祿職掌。爲職官志。其內閣部院等衙門額設滿缺。仍照會典載入。

一

本朝崇重文教。造就人材。凡

宗學

國學。順天奉天兩府學。左右兩翼學。

內廷官學。俱查明建立緣由。爲學校志。其歲貢恩貢。俱列兩府學之後。拔貢列國學之後。

一

國家車書一統。典禮明備。其有禮文專爲八旗設者。因事制宜。經曲咸具。特加紀載。爲典禮志。

一志書例載藝文。自帝王御製。下至士大夫著作。凡有關地方者。並皆登載。今將欽奉

祖宗制誥詔諭事關八旗。及